



豫章叢書

第九冊



懷葛堂集卷五

南豐梁 份質人甫著

傳

王承憲楊憲高拱極陳于宸傳

王承憲世襲楚雄衛指揮遂爲楚雄人昂藏有膽畧
挽強善左右射初以世襲已而折節讀書中武舉授
游擊將軍南渡乙酉秋元謀土司吾必奎叛其黨高
科吾定國陷定遠武定祿豐吾世安破楚雄滇中大
震會金騰道楊畏知以迤西兵討賊承憲將選鋒爲
先驅奮其勇力屢戰皆捷斬馘多遂復楚雄畏知以

是知其能甚親愛之功未上土酋沙定洲反沐天波
西奔時郡中初恢復城小而卑陞塹樓櫓多頽壞器
械朽鈍矢石缺乏饟糧匱人無固志承憲綜理甚備
畏知按行埤堦大喜曰壁壘旌旗改色矣天生是人
以固吾楚雄耳明年賊至承憲接戰大敗之賊起臨
安橫行迤東地挫其鋒自承憲始賊相顧謂勇不可
當獨王將軍耳二月賊知楚雄不可拔乃西圍大理
蒙化屠之丁亥春乘勝還攻楚雄承憲與土官那箇
更番出戰輒勝賊賊日益多築長圍鑿壕三疊環楚
雄城承憲及弟承頊慷慨乘城望長吁曰賊不破楚

雄城不休我不盡殺賊不返城中人相顧歎息爲之
飲泣承憲起腰弓矢佩劒衣重甲兜鍪大呼陷陣突
圍出貫穿賊壘賊大驚承憲矢不虛發發必應弦斃
近則揮刃手刃賊無慮百十數賊輒辟易尾而攢射
已而潰圍入矢兩服皆盡顧謂從騎取矢方返顧流
矢中要害死賊褫其甲沾濡血肉糾結不解也承頊
馳扈兄不及戰死陣中畏知痛哭曰天不欲殺盡此
賊耶何先斷我兩臂也

楊憲大理郡庠生也倜儻端方尙氣節丙戌初春黔
國公沐天波來奔戒嚴繕城守馳檄調莊丁土漢兵

軍書到蒙化麗江武定方響應賊黨王弄土司王朔
蒙自兵頭李日芳已次楚雄勰城鼎沸憲揚言於衆
曰賊乘兵未集而追上公上公在股掌中矣逃驚之
雀叢薄猶能生之大理寧不如叢薄乎智謀勇力固
城守捍禦彝郡中人事郡中人寧爲裸彝辱也長吏
郡民從其言皆刑牲瀝血盟誓嬰城守二月賊大至
攻下關踰點蒼山圍勰城數匝憲日以忠義激勸人
而督家人造餽凡守陴者餉之不問爲誰也殊死守
九閱月憲未嘗勸懈已而沐天波潰圍出西奔永昌
守禦單薄城遂陷憲使盡室登樓梁已垂縵使自經

憲之妻女媳孫女弟婦姪女凡六人憲曰男兒不能
自引決者吾無責焉耳徧視六人氣盡絕乃然薪火
熾甚自躍入死樓下薪憲積之經年也

高拱極太和人也積學舉於鄉不求仕進沐天波至
鼙城未嘗投名紙沙賊圍城拱極奮然曰蠻獍猾夏
賢聖所必誅也遂與諸生尹夢旗夢符馮士成畫守
禦策傾貲募士守九閱月城陷拱極哭曰我家世忠
貞受國家恩厚先人靈不可令土酋汗乃坎地盡瘞
祖父木主疆已縱火火屋自投池中死夢旗夢符士
成城方破先後皆自殺

陳于宸字葵若蒙化人萬厯丁未成進士任巴縣令致政歸布衣蔬食如簞人子恬然無營也烈皇帝哀詔至哭臨不能起南都陷大慟曰老臣以壽爲辱于宸之謂矣戊子年夏五月沙賊攻郡城城陷于宸策杖扶賊賊不死死之

耿廷錄張朝綱傳

耿廷錄河西人天啟四年舉於鄉崇禎十五年授耀州知州疏陳時政曰將多不如良兵多不如練餉多不如核又曰羣臣恩怨當忘廉恥當勵報小怨孰與報於國賊之元兇酬私恩何如加於飢寒之赤子縷

縷千餘言切中時病刺史所未嘗有也上優旨答之
尋陞山西按察司僉事明年監宣府軍皆著勞績南
渡安宗立擢副使分守九江先是朝議以流賊入四
川命大學士王應熊督師合四方勁旅往殄滅又以
雲南土司沙定洲吾必奎等所部種類不一皆精銳
跣足踰山險疾於平地善伏挾鏢鳥鎗佩環刀弩矢
傳毒藥器械犀利輒死好殺萬里長征上下無異志
屢著戰功請調發別爲一軍渡金沙江取道建昌北
攻流賊使上報可以廷錄雲南人乃加南京太僕寺
少卿往監定洲等軍廷錄辭卿爵於是授遵義監軍

陛辭以往崎嶇至滇督師王應熊奏罷四川巡撫馬
乾請以廷錄爲僉都御史巡撫四川疏上報可而廷
錄未行乾治巡撫事如故會流賊張獻忠死餘黨殺
曾英陷遵義蜀搶攘益甚雲南則必奎已伏誅定洲
已叛據迤東西地朝命不可制道梗咫尺不得達廷
錄擁空名里居趑趄無策無何獻忠餘黨張可旺陷
黔及滇揚言討定洲定洲逆戰革泥關大敗時丁亥
四月也當定洲之叛也破蒙化陷大理圍武定攻楚
雄敗李大贇祿永命龍在田軍雲南數千里地無一
足當定洲者土司苗羅之強可不謂爲無敵乎至是

席勝勢以當流賊決一戰遽敗北走死而後知土司之不能軍也藉令不反雖廷錄監之成師鼓行夫何能爲君子以是歎謀國爲無人耳流賊入滇所過盡屠戮河西小邑城庫不任保聚廷錄曰奉命討賊賊乃亡吾國破吾家吾死已晚矣出循深淵自溺死妻楊氏賊磨至倉卒被執罵曰奸賊我大臣妻也巾幗弱不能爲天子殺賊賊當殺我賊遂殺之

張朝綱廣通人貢于鄉任渾源州同知解組歸皂帽私室泰然無求廣通小邑屬楚雄也丁亥八月流賊下楚雄誘執金騰副使楊畏知前鋒且逼邑邑且望

風降朝綱曰余官渾源見燕趙未陷時望賊來如弔
伐師已而荼毒爲自古易代所未有燕趙人悔無及
我懼夫不死而悔之也況國家恩厚忍受之而不報
耶妻馮氏曰君意決未我唯命朝綱曰均死也到不
如縊序分東西矣請就西於是夫婦投縊死子耀邑
諸生瞪目視一哭而絕已更息忍死殯殮成禮厝窆
岁已亦雜經

王士傑張烈傳

王士傑太和丞也有幹濟才邑附郭大理守以下事
無大小咸倚任尤得士民心具知民隱其言出嚴於

教令丙戌黔國沐天波避亂至魏中二月沙賊黨王
朔遂圍城士傑言於衆曰沙賊皆裸裎耳長於伏山
澤梯高履險耳攻城所短也今亟乘墉有纏頭裹足
戴皮盔腰環刀持鏢近牛馬墻者卽下石殺之皆應
曰諾會大理兵少外援絕自長吏下逮曹掾各分地
守士傑得城南董率諸人昕夕更番轉木石無少休
十旬如一日衆共稱之一日蕭時顯步城南怪士傑
已離次士傑遺矢攝視起時顯曰沃焦釜墻下煮溲
渤澆賊可耳賊不緩攻如後者跬步不當移也士傑
曰謹奉教時顯故永昌同知解組東行道梗僑家太

和者十一月食盡援絕城遂破士傑死南城上不踰
咫尺府學教授段見錦府經歷楊明盛府司獄魏崇
治皆死之官民男婦死者凡七千人屍相枕也時顯
周覽大慟冠進賢朝服加紳縊寓廬

張烈蒙化衛千戶也有神力精於技擊乙酉丙戌沙
賊亂據雲南烈奮激言曰土酋焉敢如是所不能殺
賊不與共天日於是鍛甲冑噉弓矢礪刃待徵調時
巡撫雲南吳兆元異懦昏瞶不能討賊刼威勢顧與
賊輿從日往還明年疏請以沙定洲爲將叅代沐氏
鎮雲南以是不下各羈檄兵不得發會金騰道羽書

聲沙賊罪烈捧之歎曰殺賊此其時矣顧漢兵少不
任戰莊丁彝兵已入山刀耕火種未卽集五月賊李
日芳偵知蒙化城空虛引獍彝疾攻之烈每出必斬
賊驍將從數十騎歸各解馬上囊累累然級也竿諸
城堞指而笑曰賊留旬日城頭皆賊首矣城中人頗
傳其言識者憂爲先兆云是時暑甚盛城小汲道絕
守者怠遂陷衆奔潰烈揮刀巷戰呼聲震屋瓦身孤
受攢矛刺創重且死猶手刃賊也弔之者曰張公眞
丈夫矣名稱其實也

朱壽鏞徐道興羅國嶽宋文旦陳六奇傳

朱壽錡魯藩宗室也家兗州崇禎十三年授雲南督捕通判正直有能聲十七年陞副都御史提調楚蜀雲貴兵馬賁詔雲南徵滇兵於時土酋吾必奎沙定洲後先亂兵不能集丁亥三月流賊張可旺乘亂窺滇營曲靖城西北壽錡知不免盛儀從響道傳呼金鼓麾蓋張牙旗啟城門出雜以班劍儀刀響節骨朵簾棍卧立瓜金鉞及父繖扇靡不具導以各旛告止傳教信大書曰親臣萬里天子一家乘輜輿直入賊壘賊相顧錯愕見可旺三揖曰吾聞將軍師有名誅土酋爲黔國復仇代天子行征伐此桓文之功青史

芳流不朽也吾所以揖將軍者謝將軍入滇以來不
殺不掠之恩也壽貅辭氣慷慨聲音如洪鐘賊皆驚
異可旺挾使降不爲屈坐繫他所浹旬強以顯秩壽
貅曰豈有天潢支庶而污潢池僞職者我死何害所
恨河山未復敵寇披猖耳遂絕粒不食賊知不可奪
殺之僕二人不忍去求死賊併殺之

徐道興睢州人也崇禎間擢雲南都司經歷居無何
署篆師宗州州素梗逋道興督勸有方州人咸愛戴
翰將恐後當南北鼎沸新君立播遷流離有言及國
家事者道興涕泗橫流曰禍害中原貽患聖天子毒